

FRUCTUS, seu POMUM.

Q. Saporis aciduli. Pro varietate specierum varians.

V. Eccoprotica; refrigerans.

U. Forma cataplasmaticis adhibetur in ophthalmiis et ulceribus putridis. Succus e pomis communibus immaturis, Britannis Crabs dictis, expressus, in Anglia sub nomine Verjus venundatur. E succo paratur fermentatione vinum pomaceum, Cider dictum.

QUASSIA EXCELSA.

SIMARUBA EXCELSA.

Квассия высокая; — горькая.

Arbor procera Indiae Orientalis, Surinami et Americae australis, praesertim Jamaicae ac insularum Caribbeanarum, externa facie ad fraxinum excelsiorem accedens. Cl. Decandr. O. Monogyn. O. N. Simarubae. Perennis. *Usuale est:*

LIGNUM, durum, leve, ex albo flavescens, interne striis tenuibus notatum, cortice ex albo cinereo, fragili, tectum; summe amarum. Frustula crassiora cortice tecta tenuioribus sunt praefenda. Lignum Rhois Metopii distinguendum cortice glabro, hinc inde maculis nigris obsesso, ejus infusum a solutione sulphatis ferri nigrescit.

Q. Lignum fere inodorum est; saporis pure amari, in cortice intensioris. Analysis a THOMSON et BRACONNOT instituta, ligno Quassiae inesse docuit principium amarum, gummi, oxalatem, tartratem, et sulphatem calcariae, nec non chloridum calcii. SEVERI olei aetherei vestigia ibidem observavit; WITTING et BORCHARD praeterea ammoniam et phosphatem sodae in ligno Quassiae contineri asseverant. Principium peculia-

re, a MORIN *Quassinum* dictum, ex opinione THOMSONI resinæ intime junctum est.

V. Tonica, quin irriter, adstringat, nauseam moveat alvumque ducat; stomachica; anthelminthica.

U. In dyspepsia et diarrhœa, meræ debilitati organorum concoctionis ansam debentibus, aptum remedium. Hypochondriacis et hystericis, vel ex abusu spirituosorum ægrotantibus, adfert levamen. In febribus intermittentibus et remittentibus (in stadio convalescentiæ), arthrodynia, et sudoribus phthisicorum foetulentis, nec non in helminthiasi, forma infusi, cum aqua vel vino parabilis, vel extracti instar, adhibetur. Memoratu dignum, muscas infuso ejus cum saccharo necari, illudque tutius, quam cobaltum aut arsenicum, in conclavibus ad eas delendas distribui.

D. Infusum, ex semuncia ligni concisi et aquæ libra parandum, sæpius in die cochleatim propinatur. Extractum datur a granis quindecim ad scrupulum, vino solutum, vel pilularum forma.

QUERCUS INFECTORIA.

» » CERRIS.

Дубъ чернильнооръшковый.

Frutex arborescens, præsertim in Asia Minori frequens; in Rossia copiose crescit in montibus Chersonesi Tauricæ, inter Baktshisaray et Inkerman, nec non in maritimis Bosphori Cimmerienseis et Anatolia, ita quoque in Caucaso, præsertim ad fluvium Ksani circa Achalgori. Cl. Монœс. O. Polyandr. O. N. Amentaceæ. Cupuliferæ. *Usuales sunt:*

GALLÆ QUERNÆ (*Gallæ turcicæ, Чернильные оръхи*) sunt tumores morbosi foliorum petiolorumque punctura Cynipis (insecti hymenopteri) in Quercuum variis spe-

cibus, præcipue vero in *Quercu infectoria* (foliis ovato-oblongis, sinuato-dentatis, glaberrimis, deciduis, fructibus longissimis, sessilibus), ut *OLIVIER*, itinerator fide dignus, adseverat, nec non in *Quercu Ægilope* et *Esculo* excitati. Quæ a *Mosula* ad *Tigrim* proveniunt, sunt coloris nigricantis, verrucosæ, nucleo fusco referatæ et imperforatæ, atque pro optimis habentur; haud minoris æstimandæ sunt, quæ adferuntur ex *Aleppo*, *Smyrna*, *Magnesia*, *Karahisser*, *Diarbekir* ac interiori *Anatolia*; viliores vero existimantur *Europææ*, in *Quercu Cerri* aut *Robore* repertitiæ, rubicundæ, vel albidæ, perforatæ, intus spongiosæ. In usum medicum seligendæ sunt exiguæ, ponderosæ, compactæ, aculeatæ; leves vero, porosæ, coloris flavescentis, rejiciendæ.

Q. *Styptica*, ab acido tannico (aliis scytodepsico) copioso, et principio extractivo derivanda; acidum vero gallicum, monente *PELOUZE*, potius qua productum ex acido tannico oxydato considerandum est. Sapor valde acerbus; odor nullus; masticatæ friabiles, linguam faucesque vehementius constringentes.

V. *Adstringens*; *antiseptica*.

U. In hæmorrhoidæ cæca, unguentum e gallis in pulverem subtilem tenuatis, cum tantillo opii et pari adipis suillæ, aut butyri portione illinitur; vel si sedes alta in intestino recto est, infusum gallarum quernarum saturatum injicitur, quod fomenti instar juvat in prolapsu uteri et ani. *ALCOCK* suadet decoctum gallarum *Quercus* saturatius ad destruendas genitalium verrucas. Gargarisma quoque, pro re nata, non alienum. Confiendo atramento peridoneæ sunt.

D. Semuncia gallarum decoquitur in aquæ bilibra ad sesquilibram. Intus a granis decem ad scrupulum cum aromaticis et amaris exhibitæ fuisse dicuntur.

QUERCUS ROBUR.

» » PEDUNCULATA.

Дубъ обыкновенный.

Per omnem Rossiam temperatam et australiorem passim nemora efficit, et arbustum fere ubique provenit; in borealibus vero oris naturaliter deficit. Cl. Monœ. O. Polyandr. O. N. Amentaceæ. Cupuliferæ. *Usualia sunt:*

CORTEX ramorum (*Дубовая корка*) planiusculus, subligneus, undique cinereus, extrinsecus longitudinaliter subfissus, sæpe conspurcatus lichenibus. Tenellorum ramorum præfertur. **NUCES**, seu **GLANDES**; **FOLIA** (*Дубовые желуди, листья*).

Q. Styptica, ab acido tannico imprimis pendens. Odor fere nullus; sapor admodum stypticus, acerbitate permistus, cum a junioribus decerpitur ramulis.

V. Adstringens topica; antiseptica.

U. In cynanche atonica, relaxatione uvulæ, tumoribus œdematosis, prolapsu uteri et ani, profluvii sanguinis passivis, leucorrhœa muliebri, forma gargarismatis, fomenti, aut injectionis prodest. In ulceribus putrescentibus et carie, nec non in gangræna a cubitu cum acetate plumbi, addito pro re nata tantillo spiritus frumenti, decoctum saturatius, extrinsecus admotum, utile est. Cortex pulveratus, sacculis lineis inditus et vino immersus, in hernia, præcipue infantum, salutaris aliquando extitit. Glandes tostæ, instar potus coffeæ, in atrophîa utiles perhibentur. Decoctum foliorum laudatur in pernionibus, needum exulceratis, fomenti vel balnei instar.

D. Decoctum corticis paratur ex uncia, vel duabus, cum libra aquæ, ad dimidium consumpta, et ex-

trinsecus adhibetur. Glandium tostarum semunciae adfunditur aquae selibra, et infusum partitis vicibus exhibetur.

RHEUM.

R. PALMATUM; — COMPACTUM.

Речень.

Planta in montibus excelsis Tartariae Mongolicae et septentrionalibus Sinensis Imperii provinciis crescit. Cl. Enneandr. O. Trigyn. O. N. Polygoneae. Perennis. *Usualis est:*

RADIX, magna, carnosa, solidae texturae, cortice dilute fusco oblecta; extrinsecus, resecto eodem, ex luteo aut croceo rubet, intus iisdem coloribus, et interdum etiam albedo, variegata. Tres ejus numerantur varietates: a) **R. Ruthenicum** seu **Sibericum**, a Bucharis e Kiachta Mosquam delatum, unde in totam Europam exportatur; b) **R. Chinense** seu **Tartaricum**, quod ex urbe Canton ab Anglis in Europam adfertur; crescit in declivitatibus montium Tartariae, qui a Chinensi urbe Si-ning ad lacum Koko-Nor usque prope Thibetum extenduntur, unde flumen Chou-cho originem ducit; in provincia Chinae Shen-see colitur, ubi appellatur Hai-houng; c) **R. Gallicum** seu **Europaeum**. Ruthenicum, caeteris preferendum. Varia prostat forma, nunc rotunda vel plana, nunc longinsecula, rubicundi coloris aut albidum, interdum flavum; saporis peculiaris ingrati, amaricantis, parum adstringentis; masticatum stridet inter dentes, et salivam mox colore croceo tingit; in fractura refert superficiem venis quasi flavis, rubicundis, interdum fuscis, marmoris ad instar, distinctam. Rheum Chinense Ruthenico proxime accedit, per mare tamen vectum depravari dicitur. Turcicum, a quibusdam me-